

Yiu muher di Captain Rodger ta na Aruba



ORANJESTAD (AAN): Erleend y Ronald Roberts ta hospedando na Bucuti Beach Resort cu nan vakantie. Nan yiunan, esta Duncan y Alastair a duna nan e vakantie aki como un regalo pa nan di 50 aniversario di boda.

E fam soltero di Erleend ta Rodger y su tata tabata un capitán di laman. E ta sona familiar. Si, e muher Ingles dinámico di 78 aña di edad ta e yiu muher di Captain Rodger.

Su storia ta uno hopi interesante y ta liga cu e storia di petroleo na Aruba. Su tata, Robert Rodger tabata Capitán den Merchant Navy y despues di Segundo Guerra

Mundial, a bay traha cu tankeronan di petroleo. El a yega na Aruba na 1924 como un scout, manda pa Andrew Weir Shipping di Londres, pa localiza un bon waf na West India cu por worde coba pa acomoda tankeronan yena cu petroleo for di Lago di Maracaibo.

E capitán a rechaza Curaçao, pero a gusta Aruba. Despues di un periodo di negociacion cu Gobierno, a bay di acuerdo pa muda e deposito di petroleo for di Eagle Beach pa San Nicolas. E refineria di Lago a habri na 1928 cu Capitán Rodger como su manager.

Erleend a bin Aruba na edad

di 3 aña, y pesey a haci e viahe di tres siman riba laman cu su mama Daisey y su dos ruman muher den un tankero bashi. E famia na prome instante a biba na Passengrand, na Playa, banda di e Misa Protestant bieu. Despues nan a muda pa e "White House" den e refineria, y ora cu e bungalownan di Sero Colorado a worde traha, nan a bay biba den e prome cu a keda cla.

Erleend ainda tin bunita recuerdo di nan chofer Placido, su amigonan, di famnan Eman, Croes, Beaujon, Henriquez, y Lampe, y hopi hende mas cu nan a conoce. Tabatin solamente tres mucha muher chikito den su klas na Aruba High, e school di e refineria, y den oranan di atardi e tabata core bay beach of hunga cu su burico "Honey-Bunch".

Nan no tabatin coriente, segun Erleend ta corda. Nan tabata drumi bao di net contra sangura, cuminda tabata difícil pa haya, mayoria ta galiña y nan tabata core den nan cura. Su mama tabata cose paña pa nan. Ora cu e muchanan bay landa na e beach cerca di Fontein, su mama ta vigila nan, cu un parasol riba su cabez. E muchanan den awa ta man cu cabuya, pa asina nan no drief bay leu.

Erleend a indica cu nunca e lo lubida con Palm Beach tabata, ningun palo di mata, ningun Hotel, y na Oranjestad, un boto chikito tabata hiba muchanan na e isla chikito unda flamingonan



tabata biba. Awe e isla ey ta Sonesta Island.

E pareha gusta Aruba y Bucuti Beach Resort, y Ronald ta esun cu ta lesando e diario di Capitán Rodger, ta con-

tento pa identifica lugar y cosnan di Aruba. Nan a haci un bishita tambe den refineria, y Mike O'Hara, vicepresidente di El Paso, tabata nan anfitrión.